



梅花草堂集序



嗚呼元長先生而竟沒矣

先生沒吾邑其復有文章

乎哉先是吾邑有震川先

梅丘草堂集卷之四序文
生所為古文詞暨舉子義
務在自得不顧世之譽誅
惟時王李才名盛天下屢
以意示震川先生冀相與

助揚共廣聲價而先生不
應也以故王李之徒故掎
扼先生文使不得列於七
子之林誰知百年之後竊

其隻字皆得托於大家當
時倚扼之者安在哉震川
先生沒元長先生起焉所
為古文詞暨舉子義亦務

在自得不顧世之譽譏而
又不以震川為宗大都崛
強不屑羞從籬下生活吾
邑之風概然也今元長先

梅村草堂集卷之八
生文具在讀之真有繪水
必繪聲繪月必繪光之意
每與人談論竟日不倦未
有不聞所未聞而去者韓

昌黎何蕃傳惜乎蕃之居
下其所以施於人者不流
也然而山澤澗溪之高下
雨豈有擇耶其殆謂先生

欽先生於余內戚也不以
余為謏陋每進而譚古今
之業因以其文相屬若余
之可以傳先生也夫余惡

之以傳先生其亦先生之
自為傳耳諸孫貧甚饘粥
不能給不忘手澤梓先生
文十之六以公之當世余

梅村草堂集 序文 五
悲其志安忍無一言以識之

內姪詹尹顧錫疇題

張元長先生傳

長洲蔣鏞撰

每謂讀書操不律須索解人得其人千古神理宛相
遇予自壯之聞若寫生狀自余受書即求其人与其
書相見不覺得一夕遇元長先生于淑士座晤對
移時者虞桑畏壘之游意深已已而讀所為聞雁齋
稿則又恍遇先生真面目也噫嘻先生蓋異人真讀
書人哉余自是游先生靡歲間先生三歲能畫腹作
字十二歲為文章即有異解其尊人九川翁善誘集
課古今業而先生靈襟玄對亦靡所不徹弱冠英、

見頭角四方多北面問奇者儼然河汾舉比狀試有
司輒弗售而攻苦彌勤性靈益刻露于是為文章愈奇
自公車牘至名山業微而單詞小令皆深根名理抽
精藻林神采淋漓言、堪絕倒以故名大震席觀鷄
林爭相購以為異寶顧官諭升伯每以一代宗工自
命一讀先生文廢狀返也先生有至性九川翁歿
終身抱霜露之悲獨念愛弟世長翁所鍾情中歲亦
告殞双淚益枯居恒嘗愴當歡忽悲浸不良于視狀
不廢細帙命嗣子桐讀而聽之以耳代目探索彌富

已廢視淡寂益精研性命之學朝焚夕誦与古尊宿
相參先生既以高才彩華雄視千古用數奇負劉蕡
之厄豪情義胆無所見其奇而又奪其神明之用稍
稍寄情于酒人之遊以磨耗壯心余間遇先生坐上
崇滿騷人俠客明裝跼履雜以粉黛絲肉競奏錄事
浮白觴行如飛鳥啼月落流連未已乃扣先生索故
榻狀飲不能三蕉而少年豪舉劇与先生角竟夕不
撓晚進同人詩社居狀鄉祭酒筍輿蘭艇徜徉溪山
鮮雲麗月岸草汀花無遠不到、則披草而坐傾壺

而醉與鐵崖迂叟風流曠世神感于是四方名流折
節交歡先生豫章則王公止敬昆陵則沈公湛源茗
水則錢公龍門俱行部境內式先生之廬而造請者
海虞則宮詹錢公潤州則中翰劉公山東則司理王
公俱主盟千秋而執鞭弭與先生周旋者臨汝湯公
義仍則遙溯風期至欲假路符以踐入林之約先生
夷然曰行休矣吾無所復冀于世而煩諸公胸中
乃挂一張生哉雖然文章千古事得失寸心知吾于
道終不能忘情是吾親遺命也蓋世有布衣游而

驅駕一世才人一切冠裳逢掖盡入藜韞中者吾得
元長暨新安潘生兩人吾指不更屈矣先生著作充
棟其最著者為崑山人物傳徵文考獻無幽不闡有
董狐太史之遺焉他若四書標畧華談全書久已行
世若蘇長公編年雜紀崑山節孝錄梅花草堂詩文
集二百餘卷藏于家至于與寄偶屬試拈經生語直
凌駕王唐諸先正後有傳明文者知無能置甲乙也
元長名大復晚號病居士一云息菴老人
菴蘆生曰吾覩元長先生舉體皆古人先生蓋澤于

文章者也昔子野廢視以審音而左史亦以失明有
國語先生之為文章庸知造物者不息我黥而補我
剝哉昌黎公論河東云使子厚穷不極其文李詞章
必不能自力至必傳于後無疑也又云使子厚得所
願為將相于一時以彼易此孰得孰失必有能辨之
者吾于元長亦云

梅花草堂集目錄

卷一 崑山人物傳

盧觀 熊熙 彭祖 充賴 儒瑛

秦玉 約 殷奎 璧 箕

王英 成憲 余胤

王明善 朱璣 唐汝為 龔一德

陳則史 謹 附項駕 袁華 楊性

易恒 呂誠 范能 孫俊 沈本初

林鐘 泉

朱吉 定安 泰安 永安

王遜 復 曰敏 范從文

王震 父祖卿 偶栢

陸安 范廷珍 俞敬 支琮 徐任 附李文詠

王履 伯承 沈仲實

附沈貞許律董伯儒許謀陶浩葛括何順中

周振譽張翬范暹吳璣李郡

卷二 崑山人物傳

呂昭 旦 龔咎

陳皞 助 諫 龔詡

劉璉 夏昺 津 禹錫

周弁 璫 虞祥 震

夏昞 梁棟 昱 紈

王永和 汝霖 許剛 立 騰蛟

趙遠 昂

黃鐸 琚 玘 附張經

張翼 支鑑 王綸 附顧培 李元壽

卷三 崑山人物傳

吳凱 愈

周號

盛頤 洪

章賢張翬

屈昉 祐 儒

蔣明

張翔

王資 庭 億

朱昌

甘霖

龔理 紱

夏佑 遂

張和 穆

沈愚 魯

沈訥 僕

龔琚 震

張能 注

卷四 崑山人物傳

朱旻 栻

葉盛

鄭文康 父 壬

周恭 鄂

陳翊 王道

孫瓊 父 宗

夏璣

朱夏 文

朱萱 觀

陸容

馮鈞 琨 夢龍

顧恂 父 良

王鑑 漳 繼孝

吳瑞

張汝舟 世皞

卷五 崑山人物傳

陸鈇

高敞

姜昂

秦璫

雷

高以政

王僑

一誠

張潮石璞邵魯生

王倬

附管琪

虞臣

周瑞

汝礪

周恭

黃雲

王秩

戚軒

孫學

附張翼

顧式

邦石

張安甫

周在

復俊

龔乾

邦衡

時煥

毛澄

周震

卷六 崑山人物傳

朱希周

顧潛

父宜之

周倫

梁鳴鸞

周廣

士淹

顧鼎臣

魏校

方鵬

鳳

元儒

柴竒

大履

盧志

秦雲

卷七 崑山人物傳

周鳳鳴 鳳起

王應電 承慶

張羽

張寰

王同祖

魏庠 希直

顧夢圭 允默 懋宏

晉憲 父鷗 驥

秦鰲

顧夢川 允燁 允烈

張廷臣

顧履方 謙亨 天爵

孫雲

張情 意

吳中英

沈世麟

卷八 崑山人物傳

周大禮

王任用

王三接

李憲卿

周美

季龍伯

歸有光

張憲 臣 臣

陳敬純

周後叔 壽誼

孟紹曾

張鴻 沈孝

陳時 延經

顧夢羽 允元 允諧 允杰

王執禮

俞允文

梁辰魚

朱景運

曹治道

卷九 崑山人物傳

顧章志

徐子英

秦霑

傅遜

王逢年

龔起鳳

朱熙洽

顧永慶

潘蔚卿 士元

陳淮 陸懋

何天衢

張士瀾

丁允亨

王執法

沈楠

陳允升 如京

周詩

顧履吉 謙光

支可大

王炳衡 炳璿

許承周 旋吉

顧咸和 震宇晉瑛

支如璋

卷十 崑山人物傳

李同芳

馬玉麟

張棟

顧紹芳

王伯稠

沈曾唯

魯魯一源

諸壽明

徐應聘

張文柱

王安鼎

王臨亨

陳嘉猷

王在公

歸子慕

張振德

李胤昌

顧天峻

顧天寵

許士翀

卷十一 崑山名宦傳

芮翀

鄭達

楊子器

方豪

祝乾壽

王用章

劉應龍

聶雲翰

樊玉衝

王時熙

金華

石肯構

李三省

朱冕

沈應奎

梅花草堂集卷之一

吳郡張大復著

後學汪中鵬補訂

皇明崑山人物傳

有小引

昔揚子雲作殊言十五篇自言梗概之法得之臨邛林閭翁孺蓋考信若斯之難也予不類僭述先哲行事次第歲年叙論成傳凡十卷大要嚴覈耳目所及與其家譜牒所載乃至贈遺弔挽篇什編成一書原本事迹所得龔埏氏家藏寔多蓋龔氏自安節先生喜著

書多遺籍摘鉛次槧數十傳彌昌不類斯作
豈有至精之所想遘妄擬殊言所藉翁孺梗
概之法倍于作矣孔子曰述而不作信而好
古不好古不可以信不信不可以述吾鄉方
奉常故有崑山人物志六卷標位品目作者
之事則予不類之所不敢出耳其詳見自序

盧觀

子

熊熙

孫

彭祖

充賴

孫

瑛

盧氏其先龍興武寧人由平江徙崑山譜牒多缺不
可攷海虞季麓作崑山志勝國時崑山蓋有盧觀云

觀人有常饒隱行有常父鑑待補進士名系雖存然
行事不少槩見尚論盧氏者自觀始作盧氏傳觀之
後彬彬多風雅名節之彥各序論之俾後之覽者知
貞元之際于斯為盛焉然其詳不可得而聞也

盧觀字彥達少有志行嘗受業湯彌昌錢重鼎之門
頗窺玄奧奉親時道一無所問與人坦直無分貴
賤即其人有相負者置勿校歸斯受之無介于懷晚
嬰羸疾益肆志問學古今之業繕寫殆遍朱黃爛熳
卷軸芬潔著書凡數種及卒勉教子孫讀書修行無

長言門人私謚曰夷孝先生子熊熙

盧熊字公武元末爲吳縣訓導洪武初以故官迫遣赴京母卒告歸復起爲工部照磨尋以善書受中書舍人遷知兗州州初罹兵革民力凋弊而大帥李善長適營魯邸又浚兗河供億不貲民情洶洶公悉力調護二役並就兗民不疲會錄刑人家屬事達詔獄死上籍其家篋中僅餘麻桌上深悔之公嘗受業楊維禎博極經史尤精六書既任兗州見印文訛謬嘗爲上言之時已忤旨至是竟獲罪于彭祖

盧熊字公暨博學好古善楷法洪武初以薦授睢州同知時中原甫定歲復薦饑公一意休息惟恐傷之明年攝守事會廷詔御史清伍四方籍無見軍輒以民代而睢戶僅僅滿千點行不下百餘輩公按籍而勾之得數人上御史御史大怒欲以格詔論公曹吏震懼請如民代例公持不可乃獨身往詣御史抗言睢戶凋耗一旦盡民而充非籍之伍則無睢無睢某又何守乎御史怒愈甚公堅不奪竟得免未久卒于官州人士女製服哭之盡哀勉歸葬送者數千人道

被大雨扶携流涕無一人少卻先是兄兗州公嘗贈之詩云藿鹽清夢穩鐵石古心存人以爲不愧斯語也子充賴

盧彭祖字長嬰洪武末任武康縣縣丞永樂初薦授禮部主事坐事爲民阜城尋徵詣行在冠帶聽用以疾卒公學求適用有父風 文皇知之然竟不能相

盡孫瑛

盧充賴字次農淵源家學行誼甚高嘗被薦給事誥勅會世父兗州公逮死非其罪公負骸骨歸杜門著

書絕口不復言仕子儒

盧儒字爲已勤學有文頗自負人有請其稿者輒捧腹曰彼中有筍卒難相盡尋以薦拜中書舍人時被顧問上嘗命公作雪賦頃刻立就盡屈其同事者上深器重之有重齋稿行于世

盧瑛字克脩宣德五年進士性敏學博工古文篆籀不減夏太常太常每語人吾墨竹一派近在玉潤公太常婿也終刑部主事

論曰吾鄉縣治南故有盧氏世祿坊家宗老嘗指示

予輒言交州居官事唏噓久之其後坊不復見而額
藏夏太常墓傍盧家予得觀焉有老人出迓予自言
吾刑部後因道刑部慮囚江右事稍稍問其先世大
畧茫如也予視其庭宇甚潔葩卉爛然爲咨嗟良久
而出再往過之則爲墟矣盧氏自待補公已顯又工
詞賦交州而下皆有官職爲時聞人刑部又成進士
君子之澤五世而斬豈盧氏信然歟今求其子孫而
不得也蓋嘗伏而思之文章操行造物者皆不輕與
人惟書與畫立名最久而盧氏世擅之母多取耶又
况其人安貧味道多著書有述于後者哉予每尚論
其世慨然懷之交州死非罪即亨于名乎猶當十世
宥也

秦玉 子約

秦玉字德卿少孤貧與兄奉母家居讀書不求仕進
志行卓然務苦約其身又能歌詩自放母顧氏織紉
給業母令分志玉益感奮不勸聚徒講論二十餘年
與兄未嘗異財用家政大小惟母兄是聽已身出入
必稟而行母卒茹淡終喪未嘗澡洗俄隣家失火延

燒玉舍而母殯在堂岌岌不免玉憑棺號泣聲徹烟
焰中烈火熾然抵牖而滅人謂誠孝之感云年五十
三卒門人私謚孝友先生子約字文仲治聞強記能
析諸家異同而統貫其說綽有心行之契詩名大噪
于時洪武初應詔試慎獨箴拜禮部侍郎尋以母老
辭歸天子束帛加寶鈔再徵詣京師選授溧陽縣教
諭典教八年動履具有矩矱御史練則成待制吳沉
薦約宿學遺老宜在館閣不報未幾請老卒嘗自號
淮海道人

論曰秦之先世家淮陰宋直龍圖太厯觀用文章操
行顯子孫散居海上後徙崑山崑山之秦自孝友先
生始孝友父庚庚父樑樑父棟俱隱德不仕其世系
皆可攷然未籍崑山故不具載昔龍圖公與蘇子瞻
輩好著書文采表于後世孝友淮海相仍不絕考其
述作孝友有詩纂探說摘要雜錄諸書而淮海道人
亦有樵海樵史孝節等錄龍圖之後可謂必復其初
元明之間駸駸與劉向蔡謨父子爭烈矣

殷奎 弟璧 箕

殷奎字孝章璧孝連箕孝揚天性友愛兄弟自相砥礪而奎名尤著爲一時文人所欽矚奎嘗受春秋楊維禎深明大義又好讀濂洛關閩之書留心名教于時事屢有建白洪武四年有司薦詣京師試上等當得官州縣而奎念母老疏乞近地便養忤上旨調陝西西安府咸陽縣訓導咸陽古渭城名勝有餘而兵燹之後文采未著公本性理之學善誘生徒循循不倦以間上秦嶺涉漢阪見白雲蓬蓬自東南起念老母在其下淒然出涕噫悒久之竟以病死訃聞磨議以母屬箕而獨身走咸陽歸兄骨窀穸焉乃揮淚白母又私于箕曰母老途窮形神孔悴汝盍慎諸吾豈憂汝昕夕奉乎雍州故不在天上行當自至汝慎無念雍州念雍州其惟服勤老母聞者莫不唏噓掩涕或慮其涉遠道又司訓官貧難返骸骨而璧日夜間關丹旆無恙告母襄事母亦安箕色養眠食猶常其後箕舉秀才試廣西僉事終太平府推官

論曰殷先生孝章好著書予得覽其目如咸陽志關中名勝集陝西圖經渭城寤語等篇意必有感慨悲

續之情觸事而作而惜乎後世無傳其苦心不少概
見盧克州熊陳博士潛夫稱為孝子出處死生瑩然
不滓亦足表其素矣然非二弟歸骨養母惡能無憾
哉君子所以致嘆于在原之什也

王英 孫成憲

王英字俊伯洪武初貢詣京師授山東道試御史歲
滿授御史每有章奏輒削其牘世莫聞知而 高皇
帝愈器重之特命署都御史事黜陟惟允居內臺凡
十年陞刑部主事試郎中母老乞養出知寧海縣

大皇帝即位召還復郎中尋擢陝西按察司按察使
已改山西秩滿進嘉議大夫仍命治陝公之在西陝
也簡易有體獄至隨決不務深文巧摘而民以不寃
僧伍壽張之徒却步讐服既得代還京馳馬顛頓至
徐泗間疾作夫人閻與其僕王保隨侍徬徨莫救相
泣以歿勉含歛資斧弗滿一金用佛氏荼毘法歸葬
故里鄉人痛悼之卒時六十三子寧安定子成憲
初名廷綱以字行號真愚先生捫角時已知名黌校
雅爲葉文莊盛所賞識其後偃蹇秋闈不售應詔試

吏部選授樊都尉府訓導都尉故興于文學名知人
獨引重先生事靡細大咸從審畫與吳文定寬王文
恪醵王三原恕賦詩飲酒頡頏當世後滿九載當遷
京官公以老母乞外陞秀水縣論獎勤率情諸生尊
親之居母喪會葬秀水士送者四十人服闋補定海
得歲九十六考終于家

論曰高皇帝嘗手書敦厚王英揭之殿壁以故吾鄉
之學士大夫下至小婦稚子必稱敦厚公云敦厚公
歲六十年定海始述其事請吳文定表諸墓道即

定亦惜其歲久而不能詳也然以高帝之明聖進
退大臣人莫能測而敦厚公獨久居內臺凜凜稱職
式厚其終是非盟心勿欺不有其身能若是乎殿廷
之揭母其退焚奏牘精誠有所感著與何簡在若斯
之殷也志稱敦厚公居鄉恂恂與人易嘗鞞入市門
門者縛之公笑曰庶人不鞞禁也其如我官人何命
取幞頭示之門者謝公曰君縛鞞人不縛官人何謝
之有有負齮者與公並道而隘擠公墮水公攝衣起
夷然不顧其後齮者復遇公棄所負却走公召慰遣

之鄰翁具雞黍飯公而令適會宴公辭令就鄰飯欣然人怪問之答曰貧家無易事且吾居鄉何必造令此三事者予為童子時蓋耳熟焉斯與漢石建周仁張歐諸君子何擇哉傳云賢者識其大者不賢者識其小者天下之士不出其鄉即論公者或不盡庶幾近之予猶惜定海公文采不少槩見其行事頗著于虞參政巨之書採次為傳復載其壽予先王母詩一
一詩曰堦前葵萼如金卮堂中老人垂白絲金卮滿引紅入面白髮萬縷生春姿清晝沉沉靜歌舞笑語喧闐閣花鼓膝下兒孫獻壽杯邀迎王母來徘徊開卷爽然致有蕭散之氣將令讀者知識小之意云

余爍

余爍字茂本超悟絕倫美丰姿嘗從殷奎陳潛夫受春秋胡氏傳遂精其說里稱俊才有御史行縣美公公曰御史皮相耶恐不足盡天下士御史改容謝之洪武六年詔取賢良詣京師公應詔試入太學選授承勅即陞通政司參議試吏部尚書十七年授尚書本部上特命公定考績法公為人祇慎謙和不遺故

舊每賜休沐布衣徒步遍謁隣里有不值者輒曰煩
為道吾故余待詔兒鄉人至今傳美之

論曰虞書三載考績三考黜陟幽明典銓之于考績
重矣 高皇帝罷中書省左右丞相設九卿百揆時
叙揔于冢宰其實天子之相也皇帝慎簡天官不次
遷擢一時典銓者受成將美日不暇給類若無所事
事而考績之法特以命公此何如簡在哉雖甚盛德
稱任使英主在御夫安得高華終老哉自公以後詹
徽見殺翟善以驗封司主事驟試尚書黜陟如彼定

績者宜何如凜凜也洪武之世公可謂銓局一人
而前志不載公考績事特序論之見公之居鄉恂恂
與其在朝廷無以異也而世之小夫朝稅褐纓冠夕
聞于閭里猶沾沾車上舞哉

王明善 朱璣 唐汝為 龔一德

王明善字復初別號樵玉性剛介矩步詳視動有令
則嘗念天下甫定應從儒術童而習之可成天性乃
闕館聚徒訓飭不倦百里之間束脩之贄畢集其門
公益慷慨自負校訂訛謬刊定句讀整衣危坐聲振

金石一時興文之彥州里相望絃誦聿新

朱璣字廷儀父宗海有士行至璣益感奮力學以春秋爲已任嘗葺數椽于學宮之側安處徒衆一時執經問難者望廬而集至室隘無所置席顧設大帷庭中猶不能盡公性剛正幼從王樵玉游習其儀範說者謂不愧師門云

唐汝爲號文谷學務該洽不名一經其教因材而篤隨授隨解英特之彥有甫成誦已盡通其說者史學書法一課俱下士大夫家競相延致即宦遊數千里

載與俱主賓之情彌久彌肅甚有書之遺誠令子孫世世延之母爲勢家所奪晚歲賓於鄉白晢飄鬚衣冠皓偉左右服勤皆一時譽髦之士論者榮之龔一德字允咸漢陽判承恩之孫通經涉史屢試不售退隱東市河上授徒養母不就高門幣聘顧司馬王轉運常調之請爲東道主莫得也樊孝介慎簡都講辟公爲政公謝曰老人眊矣生平不欲訓高門子弟乃僕僕垂白時拱揖貴人之前哉令賢而許之論曰國初陳振祖潛夫蔚有聲華盧伯融昭詩文清

俊史家稱其善訓迪教子弟有法度也師之時義大矣哉然陳自華亭司訓崑山遷爲國子先生盧任揚州教授于吾鄉人士未旦旦矣非藉王朱兩先生草昧初闢人習其野疇若于訓而彬彬焉嘉隆之間師道式微競走榮貴如唐如龔斯亦矯矯于鷄鶩之群者哉 高皇帝滌瑕盪穢還之文物彌昌彌熾一鄉之士論世者詎可令其沒沒無傳也

陳則 史謹

詩文二業至于我朝斷自北地信陽其本始實由高

季迪氏季迪手闢草莽奪漢魏人已饗之利而自專其德當時學士溺于所聞何論作者即索解人政復不可得矣予攷邑志諸先生業文章母慮數十家無能出楊鐵崖之學其知信季迪實能副之者得二人焉著爲傳

陽則字文度家貧力學以師範聞于鄉里洪武七年由秀才舉任應天府治中轉戶部侍郎左遷大同府同知陞知本府公少與高啓徐賁張羽楊基輩相倡和嘗賦紫菊得句云惟有魏花顏色似春風秋露不

相同同社亟稱之呼陳紫菊

史謹字公敏少從毘陵倪瓚郡人高啓遊博學好古
工詩什善丹青甫冠從戍滇陽洪武末用翰林學士
三景薦授應天府推官在邊湖嘗悉既謝政僑居金
陵自號吳門塾樵年七十一老疾終有獨醉亭詩
集行于世

論曰紫菊翁著詩甚多不概見即當年所遺百篇寥
寥無傳矣而獨醉亭稿亦絕無及見之者讀偶武孟
錄得所為也史敏結交行一篇其詞云故人故宅居

婁城嗟予避地臨東溟兩鄉相去不多遠揮毫已結
鸚鵡盟適從別來三十載百粵東西隔嶺海臨風對
月每思君人寰滾滾知何在我今行年七十餘客遊
都門扶病軀莫愁家東杏林下握手一笑情何如子
居巷南我巷北幾度論心話疇昔輔車今日幸相依
故作歌詩寫胸臆三復斯言政堪與志傳相攷信而
志云公字公謹誤也吾鄉人物薦舉甚都如項叔馭
駕之蘆平袁子英華之該博楊秉中性之敏贍與其
父慶源皆有述于世要之不離鐵崖之宗陳史二公

故是吾鄉開山主無疑耳

易恒 呂誠 范能孫俊 沈本初

易恒字久成其先廬陵人祖斗元以宋咸淳進士尉常熟攝警崑山遂爲崑山人今世所稱蓮峰先生者也父偉字成大饒風格初試吏平江後以吉水州通判致其仕恒性簡澹卜居淞南之大泗讓仰讀俯思無域內想嘗闢地數百弓引流種樹號曰泗園興有所會嘯咏不輟以此終其身所著有陶情集子孫散處讓上脩然之致至今勿絕

呂誠字敬夫抗志高潔不祈榮利所居饒花竹點翠飛紅殊有深林籬落之趣過者望之不知其室之通也邑令慕其該達請爲司訓屢聘不許耳目聞見一寓于詩楊維禎稱其特絕瀟散不讓袁華時稱袁呂或曰呂性慎密袁自謂弗如云

范能字仲能少從毘陵謝應芳游精醫喜吟尤工法書永樂初被徵詣郡賦詩上郡守願養老母自全其天年守憐而許之日以著述爲事墻墉几席皆有雙韻世傳淞南集于時號入室弟子曰孫俊俊字叔英

父映雪翁自華亭徙居澱湖之陽至俊始築別墅于
磧溪讀書觴咏既老不輟葉文莊爲序溪南集至今
稱磧溪孫氏

沈本初字大中賦性嚴重訓養子孫號有矩度鄭主
事某嘗聘爲泮野義塾師既至鄭不迎謁力辭去杜
門賦詩有韋孟風小楷絕類顏平原時稱二絕楊文
襄被徵欲載與俱辭曰已無絕藝匡賢相豈有虛名
重友生文襄械幣候之又辭曰身安老圃無餘念興
寄青山有遠情年八十餘終

論天下之砥行名不出其家文采葩流則令聞
而行之二者宜何擇焉以予所聞林下諸人其存
者大都邑乘之緒言耳某集某集其詳不可得見矣
呂范辭辟不就沈大中不備禮而去易先生著書讓
上嶠然不滓自非彬彬質有其文者予何取焉史載
蓮峰墓隱隱馬鞍西麓如蓬萊日出之鄉可望不可
即而磧溪數椽巍然如魯靈獨存斯亦何與人事哉
要之皆先立其大者矣

林鐘 子泉

林鐘字仲鏞其先魯人自高以上附籍杭州高祖少
雅宋文林郎潮州推官曾祖和卿元德慶路儒學教
授祖輿平江路崑山州同知父仲山始占籍華亭生
公洪武中辟授崑山儒學訓導訓迪有聲會上臨軒
選士和御製思得賢才詩稱旨擢知湖廣慈利知縣
縣苦茆岡峒蠻出沒爲患朝廷勦捕之兵連不解公
肩輿獨往諭以禍福利害群蠻稽顙靡然從化未終
三考用求賢辟擢天官考功郎中永樂己丑奉命扈
從巡狩超拜亞中大夫參山東布政司事庶績咸乂
會女妖唐賽兒反與方伯就逮以歿公言溫氣清饒
瞻界屢更煩劇卓爾不群初任崑山諸生甫投分即
翕然宗師之每相與語見林先生覺意表言外別有
箴規可謂教思無窮者焉而公亦樂其土風遂卜居
黌序之左自號松谷道人著書若干卷子泉字揚伯
能讀父書不營名利周文襄稱爲君子

論曰聞之長老與林先生語如冬日送暖膚革充然
即小婦稚子願若其訓退而各自得也予嘗過夏生
曄家謁先生像頽麋不矜冠履有適宛如所傳聞語

也厚積未伸卒罹刑戮君子惜之或曰 文皇帝時
未設巡撫故藩臬福福迥異今日其所遭遇然矣夏
生之六世祖元爲公婿知之特詳予用其語表出之
或曰生所居故宋王氏逸野堂林先生卜居處至今
夏氏守其業云

朱吉 子定安 泰安 永安

朱吉字季寧洪武中被薦授戶科給事中時賦長稽
違勘合上震怒命廷臣論死籍其家公上疏言勘合
之說本以照驗歲糧曾否完納如使歲糧及限即勘

合亦不過查驗虛文今照得各省糧犯但稽勘合不
跌正糧伏賜昭蘇以弘恩宥上從之洪武二十二年
有詔肅清胡藍逆黨所在承風頗開告訐橫及無辜
寃濫已甚公又疏言雷霆震物威不崇朝上帝好生
眷回幽谷往者病狂不逞之徒已膏斧鑕所有引繩
披根之類允屬矜疑射影無憑蒙沙可憫奏入上特
嘉之有織文繡衣之賜翌日欽諭廷臣溪加獎美自
後寂無告言者尋以墨妙改中書舍人遷侍書翱翔
禁闈荏苒十年出爲湖廣按察司僉事理寃釋滯不

可殫述會註誤繫獄久之永樂大赦復召爲中書舍
人奉勅題 高廟神主春賞特厚已謝政歸篋中惟
法書名畫路遇故人負租抵罪輒粥以償之年八十
一而終子三

長定安字士隆精篆籀學相傳玉峯前有篆塚其所
瘞也翰林吳均王洪嘗爲銘誌

次素安字士粟永樂三年鄉薦授內黃教諭歷調安
仁安吉陽信三學所至條教必以尊傳註惇行誼爲
本再滿三考乞致仕甚力故人楊文貞楊文定慰留
之不可杖履逍遙終身不談世務得歲九十有三
次永安字士常好蓄古今書籍工行草出入晉唐間
時稱三傑

論曰朱氏之籍崑山自中翰公始中翰不忍以身之
察察受僞吳縉垢故逃之崑卒亨于宦勝國延祐間
有德潤者中翰父也字澤民初用趙文敏孟頫之荐
歷官編修鎮東儒學提舉浙省平章參謀長興太守
所在有聲又以書畫特聞天下至中翰益顯我朝設
科取士而中翰用薦辟起家登賢書者又是內黃公

始成弘之間御史恭靖絡繹聯翩于吾鄉以一二數
矣其始故宋直秘閣子榮一人之身也秘閣公以六
歲藐孤提携譜牒寄身椀柁間渡江而南以有今日
斯亦宇宙之大奇也哉予攷朱氏人物多務忠厚耻
爲浮薄雖復筆墨淋漓無囂然自滿之意樹德務滋
其所自取耳志稱朱之先有應得者營墓陽抱夢讓
鬱蔚林天與澤民卒興朱氏此亦道家所時有非影嚮
傳會之詞也宋兵部郎中貫爲睢陽五老中一人有
德有行蓋朱氏始基之矣

王遜 子復 孫曰敏

王遜字謙伯洪武十七年進士崑山第進士者自公
始初授上高縣縣丞蒞事明敏剖決如神考上上詔
還京師令上殿糾儀復稱旨起拜江西道監察御史
時朝廷法嚴而御史職侍從在上左右公凜凜嚴自
治無惰容然性峭直敢言事上多優容之一夕上卧
便殿公與同直者侍詔問公月光無故入御座于律
云何公請如夜入人家律上顧笑則公故悔之矣未
久求去詔許之已又原之召還公公懼竟服重死子

復字從道生三月孤既長感上之原之也發父書晝
夜讀尋登宣德五年進士第授行人司副已拜南京
廣西道監察御史公悲感交至思報稱而耿直絕類
其先御史于是人稱小御史云小御史之言事盡衆
不能堪卒戍遼陽病死鐵嶺城當是時鄉人哀兩御
史死直不盡其用然幸有子曰敏字仁功負特絕之
資年十六就童子試提學金御史竒之欲與餼公引
非令辭不就則鄉人更竒之必能成二父志也久之
弗售而諸從游者往往脫穎以去晚膺里選司訓石
門而公故不以司訓自隘尊師道成人材石門子弟
于是彬彬多文學之士矣

論曰士君子處創業之世事英主欲直行其志而免
禍災者豈易哉兩御史死直事世莫能詳然聞之長
老皆無悔于心云石門雖伏不礙雄飛化成九載拂
衣而去里後進側目嚴憚之公亦杜門著述不與物
接斯何愧兩御史趨操乎石門鬻舍災俄失小御史
遺像所在灰飛諸生家自鬚以上者面部宛然石門
召工填出之藏之家廟人謂御史入火不蒸也

范從文

范從文字復之魏國文正公十二世孫父原良獨身
官潮州卒邸舍藁葬葫蘆山中曠徑僻公間闕萬
里求之莽互不可別識乃號哭淒風苦雨間血盡眼
枯忽土陷得所識石遂負骸骨以歸洪武丙辰以國
子生奉使稱旨擢監察侍御史轉戶摠部主事奏免
株連盜倉罪百餘人同官螫之罪叵測而上謂侍臣
曰是先憂後樂之胤也寬之謫後莊浪螫者譟不止
意必殺之追戍金齒徙廣南公挈其妻子日走荒江

斷峽與魑魅逢迎海上久之赦免永樂初用薦起官
儒學歷金華東安金鄉三縣乃致政歸公既久去其
鄉廬舍墳墓皆非所有勉力稍復之建祠祀潮州公
修范氏宗譜年八十七考終

論曰予所見范復齋先生墓志如此志墓者沈玄谷
魯與先生家世姻好幼行也其時近而可信予頗採
其說作范先生傳邑志謬悠不足憑所載官職年月
履歷與沈志雅不類學者溺於所聞如此孔子曰吾
猶及史之闕文也今亡矣夫

王震

王震字子東父曰祖卿洪武初爲行人開雲南道夷山堙谷設施爲多震初應秀才舉選令益都會歲大稔民採蕻蕪給食常不繼洵洵思亂公開倉賑之吏請未受旨非例公訶之曰民饑如此而候旨賑耶直吾死民矣一境全活者無筭廷論推重之遷爲益州同知公性慷慨饒膽畧守益如爲令時而加苾馬先是益州佛寺有像能言禍福小民祈乞者晝夜相屬於道不可止公至爲設大截置觥對像轟飲無所闕

言移時寂然忽勅左右吏爲取醉狐以來吏跡草中得巨狐袒而卧公命縛之柱狐醒乞貸公顧吏曰左道惑民于律云何狐哀懇即左道無敢傷物乃命釋之像不復言

論曰王益州之縛醉狐廩廩夷山堙谷之畧矣傳稱益州故文恭絢九世孫云建炎初文恭爲御史中丞陳攻守之策甚力宰相不能用其後扈駕南遷請與韓世忠夾擊金虜可謂石畫而當時議者莫之是也數傳爲行人開道滇南烈矣益州之政妖狐怖匿直

梅石草堂集卷一
取之飲酒談笑之間無矜憤色剛正之于王氏甚矣
哉文恭不營第宅晚依薦巖寺以居歿葬白馬涇北
而益州行人之墓不可攷矣

偶桓

偶桓字武孟落拓嗜酒喜吟詠嘗贄其詩謁楊維禎
倪瓚瓚亟稱之謂有超乘挽強之力日升川至之漸
公喜退語其友雲林故是解人洪武二十四年應秀
才舉授荊門州吏目幕府多暇觴咏不輟久之致其
政歸遇淮南故人蔣用文載入京師僑居建安坊下

綸巾藜杖放情江山間久之乃還卒年八十二嘗自
作挽詩云堪憐八十白頭翁自笑生前萬事慵北闕
薦賢雖有剡南村作守竟無功耽詩不愧詩才拙嗜
酒惟愁酒盞空留得五湖風月在浪遊誰復繼遺踪
公家桃源涇嘗築江雨軒居之著江雨軒集再遊秣
陵雅慕醉吟先生之為人又作醉吟錄若干卷行于
世

論曰予讀醉吟錄信老杜晚歲漸于詩律細爲偶先
生言之也先生嘗夜起見星月交輝花影零亂自念

往與諸賢作社登金氏覽勝樓雨晴風雪類有吟咏
故不知景乃在此因賦樓夜詩雲隨鶴影翻踈箔月
送花陰過畫闌凡先生所自得如江之雨樓之夜讀
者可以想見其人而惜乎其墳墓子孫皆不可攷也
有偶嫗者事佛張家橋小巷中能言其先世嘗有瓦
枕漏箭鷄鳴歷然可聽與今志所載相合予時尚小
恨不詳詢其世系云

陸安 范廷珍 俞敬 支琮 徐任

李文詠附

君子之道始乎夫婦所能行及其至也雖聖人有所
不能盡舜爲天子臯陶爲士瞽瞍殺人此聖人所不
能盡者也孟子求其說而不得姑爲之懸解云爾聖
人受命尺地莫非其有夫何有海濱可以訢然忘天
下者哉 高皇帝刊定曆律與民更始誰能攬其法
苟盡吾海濱父子之情藉令當年有聖人者以身處
吾鄉陸孝子之事其必不能故曰雖聖人有所不能
焉千載之下論而勿議可也予按前志直叙其事而
附以五人故不敢以聖人之所不能謂後世必如是

而孝也然亦有幸有不幸焉

陸安邑三菑民父曰德甫好結客嘗緩急人難願以身翼庇之而國初法嚴凡保結人脫逝或保結非類者連坐無赦德甫以事論死將磔于市安年二十而初婚浹旬別其婦鍾刺血書代父典刑于衣袂間獨身走京師德甫忍淚面之屹不動乃伏闕請命詔特許之赴西市曹就義觀者千人無不人人泣行下安色不變揚揚如平常德甫伏屍哭盡哀提其骨東歸葬薦嚴寺南二十步既七十年從孫霈請沈誠學瘞

作孝貞記萬曆甲辰崑山教諭沈應奎爲文祭其墓
范廷珍字性中父彥良以宿望表鄉里註誤連坐事
叵測與弟廷珪詣府請代上官故頓挫之淚盡流血
百折不少却得末減遣戍河間公故善醫遂以醫濟
河間民無貴賤老幼皆爲診視病者輒起其人或忘
報勿校也晚歲喜吟學益該洽雅好率更手筆一時
齋閣題署必以乞公公亦欣然應之行年九十而筆
墨不衰魚箋鸞素紛委几席其神愈王葉文莊公嘗
記其事

俞敬字用禮父得水母王皆早背寄養張氏張故戎家子好雷人專自行已意張母孫憐而庇之如子公亦謹事孫母如王母痲癢疾痛無弗盡也永樂八年孫遘危疾将不起公剖左脇割肝和糜飼母母忽愈亡何氣發疾如初又自嚙左膊肉愈之事聞閭里間争相愛重恐其冒張氏姓遂爲戎家子也聞于朝文皇帝嘉之詔旌其門擢尚寶司丞洪熙改元陞少卿復俞姓贈父母如其官正統六年陞卿卒得年六十有四

支琮字敬將長七尺軒軒出人頂而口吃不便道詞同舍生或嘲之飲容唯唯而已學務深入不祈頓造人謂之魯勿較也家貧奉母不能具純綿令母安寢每冬月母不能寐輒取已所御青布袍覆母疊跣而坐候伺母醒乃出有郡倅慕其高義凌晨候公公貧無他袍低回久之而母睡方熟遂着短後迂倅倅知其以袍覆母寧失候官長愈益重公周文襄嘗餽之粟帛必曰以爲孝子母壽正統間里選終南京留守衛經歷葬虞家巷

徐任字惟用世家婁東父彥輝宣德中歿于京邸公
徒步號哭歸櫬里中衰麻染血如丹母楊氏有疾迎
醫檢方萬端莫效乃祈神佑晝夜稽顙頭搶地不起
而疾如故則三割其股煮糜進之母病尋愈嘗語人
吾所持奉母惟此寸心雖母在曩者瞑眩之時意神
必許我而今幸無恙得常事老母即居陋巷不堪其
憂何害乎晚又自號陋樂云

李文詠號蒼石面削骨見衣表未三十即謝去其諸
生耽娛樂久之而父大經適謝沂水政還家則又益

務爲娛樂以歡其父雨暘寒燠勿間也萬曆己亥十
一月二十四日從沂水公夜歸客且醉又圍燈而觴
之沂水性不飲顧獨好客醉漏二鼓始登樓就寢孝
子寢其下俄聞爆裂聲帶夢披衣直上而僕者李安
面且焦爛從煙燄中牽孝子下孝子直上不顧俄棟
摧瓦裂家人洶洶莫知所出質明發礫視之僅餘一
股而沂水公以覆庇故尚具體祭外知縣樊玉衝請
御史疏旌之有詔建坊旌孝子門而孝子妻王氏請
建坊與賢里曰先恭簡之宮墻在焉建如議

論曰范惟中請代父死得戍隣里爲俞用禮請落戎籍得官遂至太常何曩者陸孝子赴義之慘也李蒼石投燭救父斯與陸孝子何擇焉凡人一往之念皆可以爲聖人青袍覆母麻血如丹令此一寸心稍稍自知其爲善不敗矣吾鄉至性人未必盡傳于世如陸如李一說美往見齊禮坊右有古緯楔曰故孝子徐快往之今不知所在

王履

王履字安道興孤心遠讀書無所不極心手都靈所

作詩文書畫皆成獨造無規則首尾而神脉清澈欲令千載上未有古人洪武初嘗游太華凌跨三峰覺青柯坪爲下淋漓揮灑筆翰精良得四十餘圖且爲之記爲世傳寶初從朱丹溪彥脩學察毛髮洞五臟作傷寒三百九十七法辯標題原病式一卷百病鈎玄二十卷醫韻統一百卷索隱開微皆先賢所未發子伯承醫名藉甚兩都無子傳其壻沈仲實仲實傳其孫承先縣令方豪嘗旌承先門曰助孝

論曰自王安道游太華百餘年山東李攀龍記之俯

三峰望中原見黃河從塞外來下窺大壑精氣之所
出入自詫善載腐肉朽骨者也其言甚壯以觀安道
所紀鈎深跨險直令飛仙失路鬼無家矣安道故有
奴人阿留能解主癖驚叫險絕皆其主之所欲言亦
奇矣哉詩文書畫皆字內靈氣透漏之路而軒岐一
法可回造化指數吾鄉如沈貞許律董伯儒許湛陶
浩葛括何順中周振譽之醫如張翬范暹吳璫李郡
之畫如支鑑張翼王綸顧培李元壽之書各于其時
而霸其曹夫子兼之則安道一人耳廬丹谷有言讀

安道所著書登峰造極如其游太華時也士有特絕
之行舉一該百皆可不朽王安道其是乎

二

梅花草堂集卷之二

梅花草堂集卷之二

吳郡張大復著

後學汪中鵬補訂

皇明崑山人物傳

呂昭 子旦

呂昭字克明性耿介博通經史卓然有古人之志洪武辛未薦試徐州訓導九載化洽遷浦城縣縣丞浦多蕪地而民持貧不堪耕作公捐俸給種使民雜治之期年田野盡闢浦民永賴焉為植雙松于庭且歌之文皇帝即位詔求賢天下監司上公治行超知之

沁州瀕行父老持金固請公曰吾無劉寵之愛敢爲父老留一錢哉卻不納既抵杭則已無買舟錢矣公在沁州清操彌勵廉能之聲聞于遠近前後凡六年沁州大治初公之蒞沁也道經徐州堅冰塞川公未撲繯徐諸生爲製一毛裘贈之風雨瀟瀟策蹇驅鼓篋而去子旦字寅伯以詩經聯舉永樂乙酉鄉會試甫釋褐奉勅伐木湖湘又督開平秋稅皆稱職超拜河南僉事嚙冰茹蘖清冠中州亡何坐寅長誥誤事被繫長蘆凡十年免歸宣德初廷詔求賢復起爲建昌府推官折獄明允再滿考疏乞養母詔許之歸視其家環堵蕭然發篋得故所受詩經一卷拂拭塵網口授生徒以此終其身

論曰國初士大夫多兢凜自持廉無害時運固然如呂氏兩先生其天性矣僉憲初第沁州誠之荀酌貪泉死不歆祀中州之政惟蘖嚙冰溪毛盂飯亦饗吾清語云死可復生生者不愧是父是子其衾影之自信何如哉余每忒先生之墓黃土童童馬鬣林立欲問其墓門之石而故老盡矣悲夫

龔咎

龔咎字叔言資性無人耳目所際無不曉了嘗讀太史公書未匝歲誦論如懸河人或試之可盡卷不錯一字里人異焉時郡守方推選奇才貢京師里人相與語無如公者然畏連坐法遲回未果又不敢秘竟於後期乃補博士弟子十一年以春秋經應文學科選授岳州學正律已造士諸生多興於廉直所得俸推贍二兄然厨索然讀書不輟岳諸生有以通鑑贄者公受覽卒業便封還之謝曰已拜貺故不欲儒家

無餘籍也既數年岳州陞爲府公詣闕候調與守偕見上上問守一切民情物力守震懼莫能對公舉止巖然上顧曰是官何爲者對曰臣岳州學官也代守條對甚悉言多扼要上喜曰此可給事朕廷遂拜兵科給事中未滿歲超爲科長獻替可否侃侃無所規避會有密旨將易儲嗣公上疏論之甚力上怒巨測詔籍其家僅得賜絹三疋上色動謫戍五開衛不一年卒

論曰吾鄉盖有儒家六龔氏其第三姓云 高皇帝

六年始置六科掌叅駁糾劾之事顧必有所試之龔先生以學官代守對數言遇主竟于切直以死斯何負儒家事哉然攷其家乘不詳載疏中語但云以易儲故夫其時有所諱而不敢盡耶其子詡金川門之慟夫有所授之矣世謂先生未竟其志然有子竟之何擇焉雖然非獨其子能也即先生之配王孺人者亦烈女也五開之役泣別中途白甌自保教子述事忠孝節義凜於秋霜蓋儒家之致效若斯焉已

陳曄 從子助 助子諫

陳曄字孟東少孤貧不能就塾師學明律數給事縣庭會郟城芮州掌縣事推擇庭吏必知學者見公衣青衣航牖堂下而年特少目矚良久辟爲縣從事諭令就學公以間從林松谷鐘說春秋偶江雨桓說詩二業並興遂漉通五經之義臨池限韻無不圓美然氣不加溢青衣郊酉如初通政使趙公治水吳淞一見嗟異曰儒生也異日必爲良噐久之應幕府書記從豐城伯平交趾以年勞授會稽知縣會稽民久習慄悍弁髦官長不就繇役公至重懲其尤黠者數十

人民趣令惟謹說者謂有郟城治崑之風焉三年上計會廷詔求賢公上疏畧曰竊見河南前僉事呂旦奉旨伐木勞著湖湘徵稅開平軍儲允賴四知絕暮夜之金一清凜冰蘖之操加以長蘆被繫磨礪十年懸罄屢空愈勤學問可謂聖世遺賢允宜不次上納之詔起且推官建昌尋改公知淳安縣淳安之政一如會稽致仕還家常不自給從子助字賢佐少從鄭介庵沈倥侗輩講學談文里人號爲十鐸而公最有清才能爲長短詩歌日數十章斐亶多佳句精率更

令書法旁曉古今篆隸又能寫喬柯竹石倣漢晉印章正統初嘗以薦授桐廬縣丞九年陞知臨江新淦改金溪縣有能聲六年自免歸公有曹李洪腴田三百畝健奴數十人賣鮮于市取充伏臘賓客不更置產年五十六卒子諫字敬言崇邑訓導天順中將葬金溪公馬鞍山北鳳凰石下遇唐姚仙客妻張夫人墓輒爲文祭而掩之避三尺爲穴兆介庵聞之稱爲吾門士云

論曰昔芮侯治崑自洪武二十七年迄永樂十三年

幾于長子孫矣考侯在任奏免事故包荒田糧十八萬三千有奇開濬吳淞江淤塞二十餘里解遣催糧勾軍官校牢禁里甲駢首淹滯者數十百人械送旗軍娶婦生子于邑者二百餘人有利必興無弊不革開闢曠清之功于是為大而淳安公適見推擇卒成令器此其磨礪人才之益豈容泯滅而論者何沒沒也國初立賢無方不遺筦庫故時有如淳安之遇雖曰會其時之可為乎自非芮侯勸學何以至此士子一釋泥塗不復知學終于不振者可勝道哉金溪

參才知足不辱棠邑避地澤及枯骨予故并錄碑志不嫌諄複亦庶幾介庵訪遺之意云爾

志曰夫人京兆人值安史亂離宗族崩喪夫人幼歲辟地江南祖考名爵無得而稱爰及不惑歸于姚氏貞元七年十一月廿八日終于私家春秋六十有六以十二月廿八日葬于馬鞍山北原子長曰清次日昕後有銘十二句皆四言不書撰人姓氏中有天不祐善落我舜華疑仙客自撰

龔詡

龔詡字大章父詹官黃門以諫易儲事成五開詡方
三歲時法嚴戍者不得以親屬行先逮公母子四人
既就道多病亡而公最幼獨免會赦東歸遇黃門西
楚道中匆匆泣別未久黃門死五開公從母依外家
居春和里而勾伍之籍旁午于道積移至四百餘紙
責縣官甚急賴宗人清惠公保持之母又多賣金自
衛徵發稍緩年十四白母詣闕候補得遼陽踰年
建文君閱公直諫子又穉小不堪遠戍調守金川門
公即金川門守戍乎乃志在王室凜凜多匡衛之策

靖難師起從軍淮陰會統兵敗績力收餘衆復守金
川壬午六月十三日靖難兵逼金川門谷王穗以門
降守者奔潰公奮戈擲之不中低回走郊外異得一
當以安社稷俄宮中火起乘輿避避始大慟遁去匿
江陰常熟間然時聞竊竊追討聲夜走任陽寄馬陳
二家二家故多藏書頗修朱家郭解之義乃匿公大
園中公即讀書其間上討皇古下漁百氏几榻盡穿
多所纂述而又時時乘夜渡娄省母旁皇舊游家冷
吟孤嘯嘗有童汪非怯當年事為有慈親在故園之

句讀者傷之 章皇帝即位詔寬軍伍公始仍侍母
崑山而是時周文襄忱籍田江南具禮相就公爲條
上便宜二十事次序行之東南以安居無幾有詔調
公鎮海軍而母王夫人卒公斑白毀瘠孺慕終身自
惟鬢穉之年見比閭子皆有怙恃我獨何人春露秋
霜感思深至觸事悲號幾迴病絕母子甫合何辜至
此既久之文襄欲處公師儒之任已定議蘇松間公
不可文襄躬辟之公泣然曰即詔非食祿之臣仕亦
無害但恐負往日城門一慟耳遂去不復見築逸老

庵虞浦上讀書鼓琴其中著野古集若干卷大都忠
憤之氣光芒陸離不可磨滅云公身歷八朝年幾九
褻沒齒沉淪綱常攸賴前際後際才有搃萃者焉

論曰揚子雲言君子在治若鳳在亂若鳳豈其爲安
節先生言之也吾觀先生蓋經世之雄不遇蒙難既
明且哲以保其身要以還矢黃門不負天道而世之
論者逡巡觸諱不欲正明其當日投戈歸田之槩編
籍隱遯故不知就所著書已見行事非獨垂空文以
自雄者也文襄百世之澤藉有先生亦少槩見矣

穆廟神聖首詔卹錄壬午諸臣故先生得在廟食之列當時撫臣張佳胤抗疏請祠張黃門棟始得盡傳其事無所避諱此所謂景星鳳凰爭先睹之爲快者耶嗟乎五開百年之目至是可瞑而建文皇帝故不乏王宮守衛士矣天道神明焉可誣哉當撫臣題祠時江右龍宗武寔署先生事其詞曰龔某至性天植篤忠義於童幼之時高標代希挺耿介于阨窮之日身非官守痛國難而悲慟無窮運屬天移矢臣綱而堅持罔變至于歲名易姓竄伏江鄉辟聘數臨力辭不起方之周武應天順人而夷齊獨耻食其粟之可謂千古同節者也及考伊父以直諫死遠戍伊母以冰節撫孤童孝義忠貞一門共萃豈非蘭生幽谷無人自芳者耶其視死事諸臣雖得禍不如其慘而抗志各極其崇慷慨殺身從容就義故難以優劣論矣于是撫臣是其議請于朝制曰可

劉璉

劉璉字廷璉永樂十年進士擢拜陝西道監察御史論事諤諤無所避就諸權要凜凜憚避之尋陞山東

布政司右叅政洪熙改元上念邊將無文多踈脫議
選方面叅贊軍務督理邊儲公與沈固周頤劉紹同
見任用叅政宣府宣府故當阿魯台兀良哈出沒之
處自黃花鎮抵大同平遠堡延袤一千二百餘里地
勢荒落墩堡耗廢公至督諸揔兵官整理文書商確
機密修廢舉墜漸致殷富宣德十年轉戶部左侍郎
仍兼巡撫皇帝若曰乃者西顧移衛獨石開平一帶
惟卿守之卿秉公正之心勵廉潔之行勤謹詳明夙
夜無懈爾其益供乃職用紓朕憂公拜命竦然積資

二十八年終始一節武夫悍卒承奉丰采如恐不及
軍民人等乃至老婦稚子裔夷君長咸若其政安其
俗已已之變井源敗報踵至王佐跪伏草中人民糜
爛蹂踐無餘而公嬰城固守屹然獨存景泰二年致
仕旋卒殮手足外了無長物遂藁葬通州天順間葉
文莊叅政山西奏公在邊年久保障有功乞恩褒卹
詔賜御祭一壇遷葬崑山馬鞍山下

論曰國家肇造區宇邊防整飭自 仁宗選用方面
始一時諸臣駸駸稱提督重權矣也先之亂六師陷

沒紫荆白羊獨石馬關諸寨相繼失守而開平八驛以劉公獨存斯何愧守社稷之義哉然猶不免致于大法道死通州文莊所為疏請于朝謂此老不宜藁葬沒沒也昔李襄敏以都御史摠督邊儲隱然長城萬里其修城繕堡積草聚糧都不改劉侍郎之舊是何叅畫哉玉山之陽峩峩馬鬣即其裔不可復攷而公故免首丘之恨矣悲夫

夏昂 孫津 六世孫禹錫

夏昂字孟暘精書法以庠生膺薦預修永樂大典

成授河南永寧縣丞永寧古熊耳地人物都焉而公又時方凋瘁惟綏和為務不蘄皎皎之名會營天壽山公受牒送徒徒多道亡謫戍隆慶大學士楊傑薦書內典召還擢中書舍人久之致仕公性恬澹與人交不擇便利恂恂如也善繪雲山嵐樹識者比之朱白宮高房山老壽卒長子欽欽玄孫禹錫次子錦錦

津

津字時濟性至孝好學有文正德十二年鄉薦選象山縣知縣政務近民遷杭之昌化昌化故有安

羅樹一株初夏花開香聞十里公嘯咏其側曰此真花縣也如安仁憔悴何未幾病還昌化民遮道泣留之既歸作夏氏世譜卒

夏禹錫字九範性靈穎一覽便能得書義之所會了然心口垂髫謁歸先生進為上座弟子諸弟子學于先生者多忘年禮之浮沉諸生間不大售時有絕少一知太守王道行知之特深呼為上友同里有沈君亮俞者好古文詞饒俠骨迎君鄧尉諸山中冥搜丘壑典墳古書刺槩標位且述且作而下及擊劍扛鼎

不覆姑布之數無弗研覽與人語必具首尾雜以諧詼人人絕倒廣讌曲席爭迎致先生為快里後俊問義輒傾倒不能休曰吾古文何必不如今人吾時文賢勝古人時以為寶錄云嘉靖間諸大家多有竊其文掇巍科者而先生藍袍自如每就記室半齊魯燕翅闔越之墟夢游山水雙屐未試先生嘆曰嗟乎吾安得似曩者鄧尉時不徒托之空言也草亭寂寂玄鬢盡改對客圍碁半勝而卒時年七十二先生所著書藏其情趙弘誥徐碩家時義走人間後進皆誦法

之

論曰婦先生叙夏氏世譜言方谷珍之亂夏氏殲戮殆盡獨中書父亮方孩母抱以逃適海虞雙鳳里朱氏因冒其姓夏氏之老姑自滇南來尋訪其家獲亮告以故亮始知其先居崑山之太倉曾祖曰景芳祖曰君寶父曰文通以及亮云象山之政不能詳世譜一書可謂克家幹蠱蓋嘗反覆叙言原原本本若河漢而無極也豈夏氏之譜待婦先生文而傳者耶禹錫與其兄禹功弟禹範皆出先生門下而先生又有

寒泉凱風之思宜其有味言之矣予嘗過九範先生拜中書墓環堵蕭然使人掩涕而象山塚在顧震寔山園中小閣之左覆土為岡以資游目而馬鬣不可問矣九範既老嘗語其子幼良吾百年後會從中書游此也

周弁 從弟璵

周弁字景星少游膠庠後以太學生理監策淮揚搜剔姦利商人畏服之頗為六館士所稱說授四川嘉定州蒲江縣知縣縣故臨邛地在京師萬里外土風

囂雜不可處公至頗用明恕一切與之休養而潛化之蒲民安焉會持服歸既闕補闕之連江其治連也如蒲而加慎焉嘗曰吾曩處邛笮之鄉形勝有餘意思不加戚今雖官天府之國恒懼其渝也不加欣聞者躐之後引年自罷家居不喜飲酒日親魚鳥爲樂聞子弟課誦聲鞭如也從弟璵

周璵字季溫受春秋林先生鐘遂通三傳初授烏程教諭陞臨江南昌二府教授所至以師道自負督率諸生方嚴有法每相與講析經傳首嘗間燈火熒煌嘗至夜分乃罷後以臺省薦入爲都察院照磨尋拜監察侍御史每有奏記多軍國重務侃然正色不避權要用是秧毀遷鄭府長史剛心正骨如在御史時以疾卒于官

論曰鄭先生誌蒲江公墓自言往時嘗見其父天澤翁御史家輒述其往來江湖之槩履夷如險也以故夷險俱得焉蒲江之宦川閩不改父道卒亨於官予又見周氏宗老稱康僖小御史以前有御史故蓋御史第璵者康僖曾父也往聞康僖在臺中動引其家

先御史自礪可以知其賢矣而志皆不載其行事何也

虞祥 子震

虞祥字仲禎敏穎絕人弱冠馳聲黌校間無學者自喜之氣永樂辛卯中應天府鄉試式旋以乙榜選授金華府儒學訓導弘獎人才各充其量滿歲掌教上虞上虞子弟蒸蒸向風達材尤偉宣德乙未選除禮科給事中未幾陞掌科事脩覺貴者髡鬚也構中使創造毘盧閣僭擬非度公劾奏毀之置貴于法或謂

公欲為韓昌黎耶公笑曰不然先皇帝頒佛經四方貴璫承旨轉相煽惑塔廟寔盛禁城何地豈容此輩猖獗乎昔高帝命造僧人周知冊聖意云何且不見近者唐賽兒妄稱佛母幾溷青徐矣聞者悚服尋陞通政司右叅議敷奏詳明出納惟允正統癸亥進地官侍郎改少司馬授嘉議大夫甲子春巡視畿輔賑窮挫豪民賴以安乙丑九月十七日卒于位訃聞天子傷悼命官諭祭營葬祭酒李時勉銘其墓子震字啓東別號常春散人散人性高介不樂仕進其先

司馬卒無遺貲僦屋養其老母本兵余子俊請爲部
司務辭甚力手校遺集至老不倦自漢以下詩人都
能辨其體制工拙其譏切時事尤見風骨云

論曰予讀李祭酒志虞公墓文詳而不諛其謹飭持
大體之致隱然自見于言語諒非祭酒不能爲此作
也祭酒折脇再聯言事不輟豈妄許人者乃諛墓耶
奏劾妖僧自是大臣防微之漸如夏忠靖長揖法王
與侍郎政一膜流出耳常春散人僦屋養母讀書高
尚絕不言臣父清以成侍郎之大父作子述優游百
年曰不富貴吾不信也

夏景

夏景字仲昭少有奇徵七歲能楷書善屬對御史范
敬先行學儒生周暉以公見御史口占詩句試之應
聲而荅屬辭新警御史大奇之邑令芮子翔館以賓
禮其學日進十三受春秋司訓盧從龍而是時太守
姚善行縣甚奇公姚既被難詞連司訓諸生皆避去
公誓死相依屹不動盧注目語人曰今孔融也永樂
甲午鄉薦明年登進士第選爲翰林院庶吉士預纂

性理大全以善書召見 太宗覽其名日旁永語之
曰日宜在永上公就御正之今文日之上永自公始
也明年扈蹕還南京未幾駕幸北京公留南 仁宗
監國與舍人朱孔陽秀才凌晏如俱直東華門凡所
摹畫無不稱旨戊辰召赴北京書宮殿榜明年修三
藏內典公書第一辛丑授中書舍人 仁宗登極學
士楊公榮請公直文淵閣宣德間陞吏部考功司主
事仍典文翰正統初纂脩兩朝實錄書成賜白金文
綺尋詔書皇陵碑加承德郎戊辰以侍郎曹義薦守

瑞州瑞古筠地疆土沃衍公課農耕之年穀屢登遂
興文教嘗訪蘇文定東軒想當年種竹植蘭與其兄
子瞻過訪之處慨然久之景泰壬申朝京師遂陞太
常少卿賜誥命階中順大夫歲丁丑 英宗復辟進
正卿授嘉議大夫時年七十引禮致其仕又十三年
薨于家賜葬迎鍾浦廕子一人長子鉞讓廕季弟鑑
善事太常備園亭竹石之養次子鐸字文振以字行
公嘗進其書 景皇帝命入中書累官舍人大理寺
右寺正次鑑廕補光祿寺署丞

論曰予從白庵遊拜先生遺像如真官仙宰眉眼秀
出簪笏儼然故當名聞海外欲無問其書翰矣考徐
有貞壽藏記先生生而數驚不可止至舞象時猶然
父携之崇明觀見列仙而喜遂不復驚豈其未有所
自耶不然先生以經術進寢承恩眷賜第宅免朝參
羅鐘鼓于堂珠圍翠舞其側絹素一出能令朝鮮日
本暹羅海外諸國懸金爭購豈偶然哉先生在東朝
與尚書蹇義學士楊士奇實筦機務非簪筆備顧問
而已也而吳中稱富貴孝友之家必曰夏太常故足

重耳世傳先生爲人灑落篤于倫誼兄昺成隆慶第
果亦從坐先生徒步往省脫杲于難薦昺爲中書舍
人以此爲孝友之證此不然先生幼不負廬司訓况
乃骨肉手足哉蓋作傳者紀其生平之一事而非所
重也夏氏竹滿天下久乃益噪書法在歐虞間故不
識與陳文東何如矣

梁棟 子昱 孫純

梁棟父孟鏞洪武中嘗爲館陶主簿指衆食貧乃贊
其少子鎬民家母意甚憐將行嚙鎬背識之灑淚而

別孟鏞既卒棟思鏞不置白母詣館陶已失主家所
在不復見鏞嗚咽奔還爾後隨所至輒求之垂三十
年而棟意弥戀後以事寓居華亭東禪寺僧舍會天
大雨有一僧袒而決渠胸露出癍痕棟心怦怦動亟
就與語嚙跡宛然疾馳告母載與歸相友愛終其身
棟子昱字文輝靖恭持重不疾言猝見非常終無倉
遽之色初婚三日喪父茹淡寢苦竟禪除不入寢舍
正統十三年服闋詣金陵謁尚書驥請與相見咨嗟
久之事聞提學御史孫鼎贈之詩有孝著崑山第一

是歲登賢書後選授平定州知州省刑緩賦
務與民驅所惡而就所利州人德之後卒于官百姓
如喪考妣婦觀之日哭聲載道孟羹瓦飯相望數里
見者莫不流涕子紘字尚素成化七年鄉貢士通判
漳州已陞泉州同知愷悌清勤兩平巨寇民爲立石
頌德致仕家居檢身率物內外斬斬稱有家法云
論曰梁氏之籍崑山自宋承德郎山西平陽府通判
仲德始仲德子澤民元迪功郎婺州路經歷澤民子
璨將仕郎太原府太谷主簿璨子孟鏞鏞子棟以孝

友特聞平定泉州務滋其德其後子孫世有官祿于朝雖閨門之秀多沐恩寵人以爲發源之深而澤流長也豈不信然後稍微削在隱見之間而人情思慕之論世族者必推梁氏惟恐其後之不聞也孝友之于感人甚矣哉邑志不載館陶事不可攷然嘗爲吏賦于民何至以子出贅則其所建立亦可知已孟子曰誦其詩讀其書不知其人可乎是以論其世也

王永和 子汝霖

和字用節器度宏廓十三能文章司訓林公鐘

一見嗟異稱爲公輔之器永樂甲午薦于鄉明年中乙榜公念兩母在堂遂選授嚴州訓導嚴士易公年少故執經用相難苦公應口隨授析蘄擢絲多老儒之所未發輿論翕服退相語曰見王先生真可謂虛往實歸世間學問寧有少長哉久之改訓饒州孜孜獎掖十年無倦當公之訓饒也文廟頽圯亟請于太守潘浩將新之守有難色公侃然曰明府重改作固當而不念我夫子昔風日耶即閭巷小生猶思掃舍宇爲容俎地儒官受命于朝率諸生駿奔頽垣斷礎

間母已衰乎君子務本之謂何矣守惡而退卒從公
言會秩滿當遷少師蹇忠定時爲大冢宰薦公給事
兵科居無幾即劾奏錦衣衛都指揮馬順阿黨權倖
多以意羅織人罪薊州都督王忭不嚴守禦聽降虜
斬關而出上雖不報直聲已凜凜動朝廷矣無何陞
本科都給事嘗持節韓邸冊封某妃有中官偃蹇殿
上公糾之以法無少貸會少司寇缺銓部擬公公曰
刑科郭瑾資地高義不得先遂陞工部右侍郎時方
同辭署役繁事殷公至鳩工庀材事集而財

與民無傷害久之淮右大旱飛蝗蔽天公受命往撫
之興革利病歲乃大稔已又治河于汴築堤鑿石疏
通徐呂二洪運不膠淺正統己巳也先薄都城擁上
出塞公與英國公張輔尚書鄭瑄王佐學士曹鼐張
益等數百人俱陷土木時八月十五日也上還北狩
詔贈公資善大夫工部尚書得年五十有九公性至
孝喜讀書父子禎病痿手劑湯藥十八年如一日父
病急起所著詩文清麗條暢有梧竹集若干卷從公
觀梧竹云子汝賢字世英廕大理評事次汝霖字民

望正統十三年進士奉公恤民勞瘁成疾歷官吏科
都給事中終河南右布政使

論曰王尚書立朝風度可謂大臣父子同居垣省敢
言事亦一時之榮華矣及攷其墳墓子孫了不可得
或云今居長洲予多長洲交亦未聞有言尚書後者
獨邑志載公大父名允吉父名子禎及公之子汝賢
汝霖而已攷公行事當不至泯泯無傳于後殆是予
耳目之未廣耶公以司訓陟臺省歷卿貳扈從不辱
其身于國家超遷之意何負焉嗟乎先朝不循資格
得人爲盛其所激發者多矣

許剛

曾孫立

裔孫騰蛟

許剛字秉中永樂間鄉貢士通判鈞州廉勤敏惠所
居無赫赫名而州人懷之未久以母喪去其任州人
爲製寶廉瓶以獻言曰磁鈞產也自君戾來此而民
不苦磁請以抔土爲君戾壽令異日者尚相憶乎公
揮淚受之既服闋補霸州霸州之政如鈞又二傳爲
御史立立字伯基幼警敏明易詩二經中成化癸卯
鄉試弘治己未登進士第選授山東海豐縣知縣豐

地方四十里藩邸別墅居其強半均節爲勞而王又請牧地自益監司將議許之公持不可曰倘以王故受譴有知縣在議小損而公立召其民受所請地隨定額以絕藩王望王卒不能相加正德丙寅召拜南京廣東道監察御史公在御史臺言事諤諤險人多目公會歲例偕省臣審勘市租省臣受贓論免而啣公者坐公不糾省臣出爲吉安府推官吉有王乙者爲怨家所搆誣繫其父子八人論死公詢得亟反坐誣者而活八人一郡大服尋遷漳州府同知公請老

遂致其仕御史之後又三傳爲贈奉直大夫騰蛟字騰伯口微吃然多條暢之氣讀書飲酒意思豁如也十八補弟子員浮沉徵逐間人無知者江右劉文正選訓崑山不能俛首事左遷給諫蘇某卒爲所螫詞連公公抗聲與質辨指誓監司前見者泣下而又獨身翼蔽司訓完歸故鄉人以此重公而公亦戢影貞山中作芙蓉集若干首見者謂爲必得之技公亦慨然自命時已艾不倦也嘗與其子伯衡同秋試衡出將誦所奏牘公笑曰徐之願翁、爲衡誦終其卷不

錯一字神色甚王其後衡舉于鄉公猶讀書海上沾沾喜曰是兒必做吾姑飲酒為樂矣公性長者絕不喜談人過聞有及曖昧者輒叱曰子何從知之先是邑中盧家徒壁立乃依外家耕其硯以事父母聚順萬端皆無所悔弟起鳳不竟學公覆翼之無令為世眼所物色鳳亦謹事公儲、黃髮相友愛如嬰兒鳳病噎而公色焦然每聞嘔暖聲慟幾絕矣公嘗客游天中踰嶺表涉海東皆有詩集行于世其在汝南與蘇時雨往來倡和之作尤自謂賞心云

方奉常言黃應龍氏故有寶廉文今攷其集不載而瓶質顧家已為所滅倘所謂此最佳何得在者耶然而釣州之政用是益顯然則文與瓶皆非其藉之以久者歟御史治豐將鑿井便民飲食而城西古井甘泉涌出夫不與錫州抔土相輝映乎奉直自大父載父昌國以及其身孝友為政井潔不食後以晉寧奏最封如其官君子以為未償所積也予觀晉寧之政清強有守蓋駁、高陽氏之苗裔矣

趙遠 子昂

趙遠字弘仲永樂初以楷書稱旨詔拜青州臨朐縣丞公為臨朐廉而勤不以閒官自隘朝廷知之擢禮部儀制司主事儀曹清秩公為之益能而上念徐州南達江淮轉漕往來之衝議置倉備緩急廷推董其事者清勤無如公詔督徐州營造公又不以清秩自懈也庀材鳩工覈勤惰而勸率之不期年竣事天子嘉其能超拜河間府知府卒于官歸橐蕭然不能元驛傳州人歛錢扶柩送還鄉里葬馬鞍山北麓子丙字叔昭宣德元年鄉進士終河南輝縣訓導亦善

介孫成美鄆縣訓導

論曰按志唐都官郎趙緜壻于范氏遂為崑山人然不名其所自来宋崑山州學正趙璧自淮揚元市舶提舉趙允中自開封為我朝大理評事然則趙氏蓋兩族儀部之先不可攷以書得官與儀部相先後者又有趙楷洪武初有趙彥可見鞏昌府志崑山志不載其姓名可嘆也永樂之後景泰趙博宣德趙勉成化趙儼嘉靖趙鏞趙世貞趙士傑皆列科目僅存姓氏而已吳無譜牒一二傳後即為所不知何人而儀

部三世有官職系可攷亦幸矣予訪儀部墓有斷碑
卧壠上山中人指示予猶稱趙太守云

黃鐸

子琚玘

張經附

黃鐸字希聲永樂十三年鄉薦性耿介有數椽逼縣
治居之授徒自給不造令從學者三日不授書但令
正立堅壁不動人或怪之公曰讀書易耳舉止動盪
多蹊倚側媚之態學何爲乎鄭有林方營先祠適在
公許或問鄭貲費幾何鄭語之甚詳既退公語鄭曰
後有問者但可及工料不必詳太詳恐阻其慕義之

念蓋其與人爲善動有矩矱如此子琚字廷佩隱跡
田里讀書不輟次子玘字廷儀性沉毅美秀而才正
統初由賢良徵授光祿署丞滿考以大臣薦陞温州
府知府捕盜有功屢受恩賚

論曰黃先生之裔不可攷今志亦不載琚玘蔣明志
有之蓋幽顯詳畧之際作史者誠難言之矣永樂間
有張伯緒先生者名經成進士不拜教授鄉里二張
項璉瞿泰安之徒皆出其門其教以絕嗜好爲主蓋
嗜好斷絕則小人無緣而至天下事可爲也其言甚

大論者比之先輩王樵王慆先生而希聲淵切矣

張翼 支鑑 王綸 附顧培 李元壽

予爲人物傳意在闡幽而幽者之不能必闡也則前志限之何則凡顯者詳而幽者畧也凡詳者又有志狀贈述子孫墳墓可攷而幽者未必皆有之取具名姓而已矣寥寥數言苟且完局則不見性情不辨品格漫衍雷同則何取述作蘇子瞻言凡人意思各有所在或在鼻口或在耳目傳神者得其意思所在則無不肖矣後世俗工便求舉體皆似亦猶作史者務

令百行皆完豈不謬哉予讀前志所載幽顯之際愴然心悲其所述數十隱士之梗概類忙時作頗疑其以甲之說爲乙之傳也姑錄其名姓散見諸傳間而其僅存什一符所見聞或其他紀錄可攷者有友五人焉

張翼字文翔性峭直不能容人小過然頗爲葉文莊所獎識有御史行縣貪而黜文翔舉其誤謬數端爲諸人分別言之御史聞捕文翔繫獄謫戍開平文翔居嶺外數年多自得赦還過文莊許或言後御史貪

黠事文翔裸袒謾罵如曩時不少悔一座默然而心
躡之文翔善行草稱歐顏入室嶺北公署及所過温
泉諸名勝處皆有題識如虬龍拏攫勃勃有光氣京
師諫院題名尤稱奇偉

支鑑字汝同整潔自喜都不與世作緣每旦起拂拭
几案手界烏絲欄作百十楷字蠅頭蟬翼具有尋丈
之勢或請書宮廟墟墓碑版莊體勻畫無異小楷人
以為得書中三昧云嘗戲作叢篠澗蒲蒼翠如滴一
時寫生家爭傳寶之

三餘字理之以字行偉幹修髯頂出人上嘗冠我冠
佩玉往來君子林中動止閒適吐音清暢不知者以
為仙人云少師事沈啟南稱入室尤工篆隸楷書不
減率更令會重修闕里文廟撫臣檄公往視事穹碑
六額肉骨傳至今至今廟撫之冠嘗與修武廟實
錄及崑山志所著崑山續詠節烈編等書藏于家初
公之師啟南也魚箋鵝素爭往其門公曰嘻此從師
門入不足奇遂用書法顯而啟南晚歲不勝求多借
筆于公公裔孫去非嘗出啟南索染帖數十紙每稱

公青尚于藍焉君子林者公所居在郭南湓瀆里
顧培字起元以字行號武英怕冢孫也性好閒適卜
居東城巷老段不以門第自伐布衣草履泊如也善
寫竹尤工篆隸時贈公已老壽喜述作每有撰著必
授公書跋而藏之而太保文康公亦時竊公餘派間
寫竹石贈公公處金紫焜煌間安貧守志子子自將
壽考年

李元壽字仁山善楷書聞於閭里三原王端毅公怒
巡撫江南見公書聘之呼爲李生舟行巡視必携公
與俱啟牘牋素皆出公手或無爲于舟中則令誦大
禹謨皋陶謠而莊聽之又嘗爲顧御史潛寫進奏書
天子以其書爲善爲人淳篤訓子弟有法而又善書
以是爲縉紳所重即他州碑石往往屬公云

論曰昔之工書畫者類皆不得志于時聊借此自快
以爲當吾身見諸行事之實何係何求而後稍營營
美其不志何怪焉予第大年字世長嘗受畫于吳趨
張元舉不祈形似要得其意思所在者也而世長嘗
語予此道非諧世之術不須有爲而作有爲爲之則

必不佳人稱世長畫似唐子畏書法李北海世長笑
不荅而私于所親曰夫然則安所置我矣世長之書
猶在季孟間而于子畏直旦暮遇之也予作五人傳
并志世長語夫亦其神之必傳者耶

梅花草堂集卷之二終